

**Inatsisartut aalajangiiffigisassaattut siunnersuut Naalakkersuisut peqquneqassasut Nukissiorfinnut nalunaaruteqaqqullugit, akinut suliffeqarfiup allattorsimaffiani allaqqasut allangortinneqassasut, siunissami ima allassimalerluni innaallagissamut atuisut nunami aalisakkanik suliffissuarnut innaallagissamut akikillisaaffigisaraat aammalu imermik atuisut nunami aalisakkanik suliffissuarnut imermik akikillisaaffigisarai, maannakkutut ikkunnaarluni Nuummiuunerusut ataatsimoorullugu kiassarnermik atuisunit akilerneqartarunnaarsillugit.**  
(Inatsisartuni ilaasortat Siverth K. Heilmann aamma Steen Lyngø, Atassut)

### **Akissuteqaat**

(Pinngortitamut, Avatangiisinut Inatsisinillu Atuutsitsinermit Naalakkersuisoq)

### **Aappassaanneerpeqarnera**

Naalakkersuisut sinnerlugit Sanaartornermut Ataatsimiititaliaq siunnersuummik matuminnga suliaqarneranut qutsavigaara.

Siunnersuuteqartup nukissiuuteqarnermi akit ilusaannik allannguinnissaq kissaatigimmagu paasilluarsinnaavara. Naalakkersuisoqatigiinnissamut isumaqatigiisummi aamma inuuniarnikkut atukkat assigiinnerunissaat qulakkeerniarlugu, nunatsinnilu inuussutissarsiutinik ineriartortitsinermit periarfissanik pitsaasunik pilersitsiniarluni tamatumani aaqqissuusseqqinnissaq siunnerfigineqarpoq.

Kisiannili akit ilusaannik paasinninnissaq pisariusuuvoq, aammalu nukissiuutinut akit inuit ataasiakkaat ulluinnarni inuunerannut suliffeqarfinnullu atugassarititaasutut sinaakkusiussanut isumaqartorujussuupput. Taamaattumik akit allangortinneqannginnerini misissueqqissaarnissaq isumalioqqissaarnissarlu pisariaqarpoq. Innuttaasut inuuniarnerannut atugassarititaasunik pitsaasunik qulakkeerivigineqarnissaat isigissagutsigu, nukissiuuteqarnermi akit ilusaat pingaarutilimmi inissisimapput. Taakku ilaatigut akileraartarnermi iluarsartuusseqqinnissamut, aammattaaq taamatut siunnerfeqarfiusunut aammalu piareersarneqartunut atasutut misissuiffigineqartariaqarput.

Tamanna tunngavigalugu Naalakkersuisut ataatsimiititaliatulli siunnersuut itigartinneqassasoq inassutigaa.

Siunnersuutip suliarineqarneranut atatillugu oqaaseqaatit saqqummersut akit ilusaannik suliaqarnermi ingerlaqqinnerani Naalakkersuisut ilanngutissavaat.